

Visoki predstavnik pozvao na postizanje rezultata na uspostavi jedinstvenog ekonomskog prostora u cilju promoviranja investicija i stvaranja novih radnih mjesta

Dvostruki sistem oporezivanja koji je postojao u BiH do prije svega nekoliko sedmica "išao je protiv svake ekonomske logike i uveliko je ometao napore koji su se ulagali na privlačenju investicija u BiH, podsticanju privrede i otvaranju novih radnih mjesta", izjavio je visoki predstavnik, Paddy Ashdown, na sastanku koji je održan danas sa visokim zvaničnicima Države BiH, Entiteta i Distrikta Brčko.

Između ostalih, na sastanku u prostorijama OHR-a učešće su uzeli ministar trezora institucija BiH Ante Domazet, vršilac dužnosti ministra finansija Federacije Šefika Hafizović i ministar finansija Republike Srpske Simeun Vilendečić, s ciljem rješavanja tehničkih pitanja koja se tiču efikasne provedbe mehanizma za utvrđivanje pripadnosti prihoda od akciza.

Prema sporazumu koji je stupio na snagu sredinom jula, akcize se sada plaćaju samo jednom, i to u entitetu ili unutar fiskalne jurisdikcije u kojoj se vrši potrošnja proizvoda. Ranije su proizvodi koji su se proizvodili u jednom entitetu a plasirali na tržište u drugom entitetu bili oporezivani dva puta, jednom u mjestu porijekla a drugi put u mjestu prodaje. Pomoću mehanizma za utvrđivanje pripadnosti, prihod od ovih poreza ići će u dva entiteta i Brčko distrikt.

“Ja istinski vjerujem da nova ekonomija koju želimo uspostaviti u Bosni i Hercegovini počinje odlukom o ukidanju dvostrukog oporezivanja”, rekao je visoki predstavnik. “Naše dugo putovanje je otpočelo ovim prvim korakom koji ste vi napravili”.

Visoki predstavnik je rekao da je primio brojne pritužbe od privrednika da je često teže izvoziti proizvode iz jednog entiteta u drugi nego u druge zemlje. “Mi moramo izgraditi snažnu ekonomiju kako bismo otvarali radna mjesta”, rekao je on. “Najvažniji korak koji možemo poduzeti u tom smjeru jest uspostavljanje jedinstvenog ekonomskog prostora”.

Učesnici sastanka su detaljno razmotrili primjenu mehanizma za utvrđivanje pripadnosti prihoda od akciza, preispitali stope koje će se primjenjivati, na primjer, na lož ulje i kafu i razgovarali o pitanjima vezanim za kompjuterske sisteme koji će služiti kao podrška ovom mehanizmu, kao i o daljim koracima koji se stalno moraju poduzimati u cilju osiguranja ispravne primjene ovog mehanizma na terenu.